

Kashmir Menjadi Lautan Api Kerana Kecuaian Bangsa-bangsa Bersatu

Dalam majalah Qalam bilangan 16 (November 1951) suatu rencana mengenai Kashmir telah ditulis oleh Kapten Mas'ud, seorang Pakistan yang berkhidmat di dalam tentera British di Singapura, di dalam bahagian penerangan bertajuk "Kashmir – Seperti Gunung Berapi Yang Akan Meletus". Gunung berapi yang menyala di Kashmir itu, pada bulan September yang lalu telah meletus iaitu di antara kerajaan Pakistan dengan kerajaan India di dalam persoalan kedudukan Kashmir yang tersebut. Perjuangan sedang berjalan di dalam masa menulis rencana ini dan percubaan-percubaan dibuat oleh Bangsa-bangsa Bersatu untuk memberhentikan tembak-menembak di antara kedua-dua kerajaan yang berperang dengan tidak mengisytiharkan peperangan.

Satu Rumpun

Penduduk-penduduk India dan Pakistan berasal daripada rumpunan yang satu di bawah kerajaan India dan pada 15 Ogos tahun 1947 telah dipersetujukan India dibahagi dua mengandungi kerajaan India dan kerajaan Pakistan (di timur dan di barat) iaitu di dalam golongan-golongan yang banyak orang Islam di dalamnya. Rancangan mendirikan Pakistan itu (berpisah dari India) tumbuh dan lahir daripada otak putera Kashmir, al-'Allamah¹ Iqbal seorang ahli falsafah dan penyair yang masyhur. Kepada orang Kashmir rancangan mendirikan Pakistan itu bermakna mereka bebas daripada satu kurun lamanya hidup di dalam kepapaan dan kehinaan di dalam pemerintahan Hindu – berpindah kepada suatu kehidupan yang mulia dan berkebesaran di dalam pemerintahan sendiri yang berdasarkan Islam.

Demikianlah apabila diisytiharkan penubuhan Pakistan dalam bulan Ogos 1947 maka seluruh Kashmir telah berhari raya dan bersukacita dan doa selamat serta kesyukuran diadakan di segenap ceruk dan rantau di Kashmir. Orang-orang Kashmir tidak ada syak sedikit jua pun bahawa Kashmir akan menjadi sebahagian daripada Pakistan dan tidak menyangka sama sekali bahawasanya ada tipu daya kerajaan

British sekali lagi ke atas Kashmir setelah menjual Kashmir itu seharga 1,500,000 pound kepada seorang maharaja India bernama Dulip Singh setelah berasa payah menguasai tempat itu pada 9 March 1846.

Permusuhan dan penindasan

Orang-orang Islam yang diketuai oleh Muhammad Ali Jinnah mengambil keputusan untuk berkerajaan sendiri – tidak mahu bersatu dengan Kongres bagi pemerintah di India dan mendirikan kerajaan Pakistan itu, sebabnya tidak lain, kerana sentisa berlaku permusuhan di antara orang-orang Islam dengan orang-orang Hindu dan penindasan-penindasan Hindu terhadap orang-orang Islam yang terus-menerus berlaku dari zaman-berzaman sehingga hari ini. Baru-baru ini, sebelum peperangan berlaku di antara Pakistan dengan India, banyak kejadian-kejadian langgaran yang dilakukan oleh orang-orang Hindu kepada orang-orang Islam di dalam negara India sendiri di dalam mana masih ada seramai 50 milion orang Islam yang hidup di India. Di tempat-tempat yang terpencil dan di tempat-tempat yang sedikit orang-orang Islam di sesuatu daerah maka kehidupan mereka tidak aman dan tidak sejahtera daripada gangguan orang-orang Hindu yang agamanya menjadi agama rasmi bagi kerajaan India.

¹ Juga dibaca sebagai Allama.

Di dalam masa pembahagian kawasan India dan Pakistan yang tadinya Kashmir diketahui oleh orang Kashmir sendiri akan terletak ke dalam daerah Pakistan telah tidak menyedari suatu pakatan buruk berlaku di Srinagar dan di Delhi mengadakan sesuatu rundingan dengan maharaja keturunan daripada bangsa Sikh, Hari Singh dan dengan tipu helah serta pujukan orang Kongres India maka Maharaja itu bersetuju mengadakan isytihar akan masuk ke dalam bahagian India apabila beberapa peraturan dijalankan. Ada dua kepayahan yang akan merintang tujuan-tujuan mereka:

1. India tidak akan dapat berhubung dengan Kashmir jika garisan sempadan di Punjab digariskan mengikut letaknya umat di situ;
2. Penduduk-penduduk negeri Kashmir sendiri mengandungi 79 peratus orang-orang Islam.

Bagi bahagian yang pertama tidaklah begitu payah bagi India, apabila mereka dapat memujuk kerajaan British. Sir Cyril Radcliffe yang menjadi orang tengah bagi penyelesaian di antara dua bangsa itu memberi “timbang rasa” dengan memberikan daerah Gurdaspur di dalam Punjab yang kebanyakan penduduknya orang-orang Islam dan berhampiran dengan Pakistan kepada orang-orang India. Perkara inilah yang dipandang sebagai suatu jasa yang besar Bagi Lord Mountbatten kepada India tetapi sebaliknya menjadi suatu duri kepada Pakistan kerana dengan pemberian kawasan itu kepada India adalah membolehkan India berhubung langsung dengan Kashmir mengikut jalan darat dan dapatlah ia membuat jalan raya melalui bukit-bukit Jammu. Dengan jalan ini ia dapat menghantarkan angkatan perangnya dengan alat kelengkapan senjatanya ke medan-medan perang Kashmir. Inilah “khidmat baik” dari Sir Radcliffe dan inilah menjadi halangan yang pertama yang besar masuknya Kashmir ke dalam Pakistan iaitu jalan



Almarhum Quaid-i-Azam Muhammad Ali Jinnah

penaja negara Pakistan.

masuk tentera India untuk menjajah Kashmir.

Halangan yang kedua pula – halangan bilangan banyaknya orang-orang Islam di Kashmir itu mereka menggunakan kaedah yang senang dan berkesan iaitu menghapuskan orang-orang Islam atau menghalang mereka ke Pakistan dengan suatu rancangan dan kaedah yang berjalan dalam lain-lain negara Hindu dan Sikh seperti di Patiala dan Kapurthala dan kaedah ini pula dipakai di Kashmir. Mereka menggarung dan membunuh beramai-ramai orang Islam dan menakut-nakutkan mereka sehingga

menjadikan mereka di dalam ketakutan. Di dalam daerah ini hampir-hampir dua ribu orang Islam terpaksa melarikan diri sehelai sepinggang masuk ke dalam daerah Pakistan kerana tidak tahan dengan keganasan itu. Tetapi dengan inayah Tuhan rancangan mereka di Kashmir telah salah kira.

Pembunuhan Bermaharajalela

Maharaja dan penasihat-penasihatnya tidak mengendahkan kehendak dan kekuatan umat Kashmir. Maharaja Hari Singh telah menghantarkan soldadu-soldadu Dugra ke serata negara. Mereka mengganggu penduduk di situ dan dalam masa itu pula kumpulan-kumpulan pembunuh Akali dan R.S.S., dibawa masuk dari India dan mereka mengadakan tunjuk-tunjuk perasaan dan berbaris hendak menakutkan orang-orang Islam. Langkah mereka ini berjaya sedikit dan dalam bulan September, sebulan lepas perpisahan itu, kumpulan-kumpulan kecil orang-orang Islam telah pindah dari Jammu menuju ke Pakistan.

Dalam bulan Oktober dan bulan November tahun itu orang-orang ini telah bermaharajalela di Kashmir dan telah membunuh dengan tidak menaruh belas kasihan terhadap orang Islam. Beberapa orang pegawai-pegawai Islam di dalam pasukan polis telah diberi pencen, dibuang, ditukar ke hujung-hujung negeri ataupun dipenjara. Polis dari orang-orang Islam dari pasukan polis dilucutkan senjatanya dan yang demikian pembunuh-pembunuh Hindu terhadap orang-orang Islam pun sangat berleluasa. Polis-polis Dugra memberi sokongan kepada mereka dan dengan kerana itu pembunuhan semakin bermaharajalela dan banyak berlaku. Dengan demikian orang-orang Islam bertambah banyak menyeberang sempadan masuk ke Pakistan.

Bagi Maharaja Hari Singh langkah-langkahnya itu baik sahaja terutamanya di bahagian selatan Kashmir tetapi di daerah barat seperti Mirpur, Puncha Muzaffarahad²

keadaannya tidak boleh dikatakan begitu. Orang-orang Islam di sini keras keadaannya. Daerah ini telah memberikan 60 ribu orang putera-puteranya kepada tentera-tentera British India dalam Perang Dunia yang Kedua. Daripada pahlawan-pahlawan tua inilah mereka telah merasa berjuang di medan perang Eropah, Afrika, Timur Tengah dan di dalam hutan rimba di Burma dan Malaya mereka telah mengukur pedang mereka dengan ahli-ahli perjuangan Jerman dan Jepun yang terkenal degil itu dan telah mendapat nama dalam perjuangan-perjuangan mereka.

Pembunuhan Beramai-ramai

Mereka tidak gentar kepada soldadu-soldadu Maharaja dan langkah itu tidak menakutkan mereka. Apabila mereka dapati askar-askar Dugra itu menganas dan mencabar, mereka pun mengambil keputusan bahawa telah tiba masanya mereka mengangkat senjata berjihad mempertahankan jiwa dan harta benda mereka serta kehormatan perempuan-perempuan mereka. Mereka mula menyerang tentera-tentera Dugra di Nila Bhat. Tembakan yang pertama yang dilakukan mereka, menjadikan kemegahan, kegembiraan dan kesombongan sebagai permulaan perjuangan sebagai kebebasan daripada seksaan dan kezaliman yang berkurun-kurun lamanya. Kejayaan didapati mereka kerana mereka itu lebih mengetahui tempat-tempat dan bumi Kashmir. Itulah permulaan api pemberontakan mujahid-mujahid Kashmir yang kemudian meletus di seluruh negara yang nyalanya telah menjulang menjilat-jilat tembok-tembok istana Maharaja itu di Srinagar. Kejadian ini telah berlaku pada 20 Oktober 1947.

Maharaja Hari Singh melarikan diri ke selatan. Di sini ia menuntut bela dengan melakukan pembunuhan ke atas penduduk-penduduk Islam yang tidak bersenjata dan menghalau mereka keluar. Maharaja itu sendiri telah kelihatan mengarahkan pembunuhan beramai-ramai. Dengan mengenderai sebuah kereta jip dengan senjata *sten gun* di tangannya ia telah menembak orang-orang Islam yang tidak bersenjata

² Perkataan sebenar ialah Muzaffarabad.

itu bertempiran lari. Ia telah menghantar kawat untuk bantuan rakan-rakannya di Delhi dan askar-askar India pun diterbangkan masuk ke selatan Kashmir sebagaimana yang dirancang. Demikianlah dengan bantuan India kedudukan Kashmir keadaannya seperti sekarang. Dengan bantuan Angkatan Payung Terjun India itulah Maharaja itu terselamat. Tetapi Maharaja itu terpaksa tinggal di bawah kerajaan India beberapa bulan lamanya dan pada masa itulah pula Maharaja itu menghendaki supaya Kashmir bersatu dengan kerajaan India. Langkah ini disokong oleh seorang Islam yang berpengaruh, Sheikh Mohammed Abdullah Ketua Persidangan Jammu dan Kashmir yang kemudian dilantik menjadi Perdana Menteri negara itu. Pada 6 Januari 1948, India, telah membawa perkara Kashmir ke Majlis Keselamatan Bangsa-bangsa Bersatu dan menuduh Pakistan menolong pemberontak-pemberontak itu. Sekalipun pemberhentian tembak-menembak diadakan di Kashmir pada bulan Januari 1949 segala usaha tenaga Bangsa-bangsa Bersatu untuk menyelesaikan soal Kashmir itu telah tidak berjaya. Rancangan untuk mengadakan pilihan raya bagi menentukan kehendak orang-orang Kashmir sendiri – masuk ke India atau ke Pakistan ditolak oleh India.

Berpuluh-puluh Tahun Dalam Penjara

Semenjak dari itulah India memandang bahawa Kashmir itu adalah sebahagian daripada India dan mereka meletakkan tenteranya yang banyak di sana untuk menindas orang-orang Kashmir yang cuba membebaskan diri dari penindasan itu. Kalau tadinya Pakistan hanya mengadakan tuntutan-tuntutan melalui saluran Bangsa-bangsa Bersatu tetapi dari satu ke suatu masa India menguatkan kedudukan di Kashmir sehingga tiap-tiap lima orang Kashmiri sekarang dijaga oleh empat orang tentera untuk mengawal penjajahannya dan dengan cara ini dapatlah diukur bagaimana penindasan-penindasan orang-orang Hindu terhadap orang-orang Islam di Kashmir itu

sehingga Sheikh Mohammed Abdullah yang dipandang pengkhianat kepada umat Islam kerana menyebelahi dan menyetujui bersatunya Kashmir di dalam India terasa kepedihan itu dan menyedari bencana-bencana yang terjadi dan menunjukkan bantahan sehingga berpuluh-puluh tahun ia dipenjarakan oleh kerajaan India dan tidak dibenarkan langsung berhubung dengan orang-orang Islam.

Baharu-baharu ini beliau telah dikeluarkan daripada tahanan dan menunaikan fardu haji tetapi tidak dibenarkan pergi ke Pakistan. Sepulangnya dari haji beliau ditangkap semula oleh kerajaan India.

Syarat-syarat Yang Mesti Dilaksanakan

Mujahid-mujahid Kashmir mengadakan pemberontakan semula terhadap penindasan itu pada bulan Julai 1965 ini. Radio pemberontak melaung di angkasa Kashmir mengisytiharkan jihad kepada pemerintahan Hindu. Tentera-tentera India mengadakan tentangan dan kemudian menuduh kerajaan Pakistan menghantarkan penyeludup-penyeludup masuk ke dalam Kashmir membantu pemberontak. Kerana itulah dengan tidak ada amaran lagi pada bulan September yang lalu kerajaan India menyerang Pakistan, menceroob sempadan Pakistan dan demikian terjadilah peristiwa yang berlaku sekarang iaitu perjuangan senjata yang hebat yang bakal membakar dunia, kalau tidak lekas dikawal.

U Thant Setiausaha Bangsa-bangsa Bersatu dan Dunia-dunia Bebas menghendaki berhenti tembak-menembak di antara keduanya dan menyelesaikan persoalan itu di atas rundingan. Masalah Kashmir 16 tahun telah terbiar, penyelesaian tidak didapati semenjak daripada berhenti tembak-menembak yang pertama dalam bulan Januari 1949 itu. Dunia Barat yang berpengaruh seolah-olah tidak memerhatikan kehendak umat Islam, dan India masih menghendaki Kashmir sentiasa di bawah jajahannya. Pakistan tidak akan mahu berhenti

tembak-menembak kalau tidak syarat dari mula yang dijanjikan oleh Majlis Bangsa-bangsa Bersatu dilaksanakan iaitu berhenti tembak-menembak hanya ada sekiranya Majlis Bangsa-bangsa Bersatu menyetujui supaya tentera India dan Pakistan keluar dari Kashmir dan selama tiga bulan³ Kashmir hendaklah dikawal oleh tentera dari Afro-Asia sehingga selesai pemilihan umum di dalam masa tiga bulan bagi menentukan ke mana sebenarnya kemahuan umat Kashmir – ke India atau ke Pakistan.

Permintaan ini adil dan patuh dan meletakkan kemahuan umat Kashmir sendiri kepada siapa dikehendaki mereka. Umat Pakistan telah merasai sangat pedih apabila mengetahui bagaimana penderitaan umat Islam di seluruh India yang sebanyak 50 milion orang itu sentiasa diperkosa oleh orang-orang Hindu tidak putus-putusnya dari suatu masa ke suatu masa. Umat Pakistan telah mengetahui bagaimana ganasnya algojo-algojo dari India (dari kerajaan Hindu) terhadap kepada umat Islam saudara seagama yang tersimpul di dalam ukhuwah Islamiah yang lebih rapat dan lebih hampir daripada persaudaraan darah daging.

Kedegilan India

Adakah menjadi suatu perkara sambil-sambil sahaja dilakukan oleh Bangsa-bangsa Bersatu selama 18 tahun membiarkan 4,500,000 orang umat Kashmir tidak ditentukan keadaan mereka untuk memilih ke mana mereka berada bagi menyelenggarakan hal ehwal mereka? Adakah ini satu perbuatan sengaja melalaikan perbuatan di dalam suatu daerah yang tersebab ia golongan Islam tidak dapat perendahan yang saksama dari Bangsa-bangsa Bersatu?

Delapan belas tahun lamanya Pakistan telah menuntut dilaksanakan pemilihan umum di Kashmir sebagaimana yang dianjurkan oleh Bangsa-bangsa Bersatu tetapi India berdegil dengan alasan apabila diadakan gencatan senjata pada

tahun 1947 tentera Pakistan tidak diundurkan dengan sewajarnya dan itulah India mengiktiraf bahawa syarat-syarat gencatan senjata tidak disempurnakan oleh Pakistan lalu ia menjajah Kashmir dan dengan pusing belitnya sebagaimana yang tersebut di atas bersama-sama Raja Hindu memasukkan Kashmir di dalam daerah India. India membuat yang demikian sambil melupakan bahawa sesudah gencatan senjata itu tentera India membanjiri Kashmir dengan sepenuh-penuhnya buat menindas dan menjajah umat Kashmir. Apakah ini tidak dinamakan penjajahan India terhadap Kashmir?

Dalam masa rencana ini ditulis peperangan yang tidak diisytiharkan di antara India dengan Pakistan itu telah berhenti apabila Majlis Keselamatan Bangsa-bangsa menuntut supaya tembak-menembak diberhentikan. Tembak-menembak itu berhenti pada hari Khamis jam 5 pagi (20 September 1965). Sungguhpun tembak-menembak berhenti di antara kedua-dua kerajaan itu tetapi tidak bermakna bahawa penyelesaian soal Kashmir sudah tamat kerana salah satu syarat-syarat yang disampaikan oleh Menteri Luar Pakistan, sekiranya masalah Kashmir tidak segera diselesaikan oleh Pertubuhan Bangsa-bangsa Bersatu maka Pakistan akan keluar dari pertubuhan itu.

Dalam pada itu mujahid-mujahid Kashmiri menolak pemberhentian tembak-menembak itu dan mereka terus berjuang sehingga mereka akan bebas daripada penindasan kerajaan India. Apa akan jadi terhadap kepada langkah-langkah ini masing-masing kita lihat kelak.



³ Perkataan sebenar ialah bulan.